


Gij Doxceng Ndaw Ndoengfaex

树林里的争吵



Youq ndaw ndoengfaex caem-dingh, miz hauilai doenghduz youq gizneix gwn youq. Duz roeg-gyaeujmeuz hwnj sat yebanh le hainduj ninz lo; duzroeg ndwn youq gwnz nyefaex ciengq gij go ndeidingq; duzloeg youq ndaw ndoeng angqyangz buet dwk……daihgya cungj nyaengq guh gij saeh swheij. Sawqmwh, raq sing doxceng he youq ndaw ndoeng andingh neix cauz hwnjdaej.

“Mwngz yawjyawj mwngz, bwn gwnz ndang cungj dwg ndaemnwnwt, di saek gyaeundeidei he cungj mbouj miz, sing ciengqgo lumj sing aenlaz vaih nei, lij gamj caeuq gou beij ndeidingq!” Roegvenz dasang mbe gaiqfwd de, ndiengq rieng de hwnj naeuz.

“Dwg ha, gou cingznyinh mwngz maj ndaej gyaeundeidei, hoeng dan baengh baihrog gyaeundeidei caeuq sing

ndeidingq lij mbouj gaeuq bw, aeu lumj gou nei miz aen’uk coengmingz cij ndaej, rox lwi?” Roegga menhmenh naeuz.

“Mwngz duz roegga neix, mwngz gangjgangj mwngz dauqdaej coengmingz youq gizlawz?” Roegvenz cam.

“Ndei, gou naeuz mwngz nyi ba: Gaxgonq, cojcoeng gou……”

“Dingz! Mwngz dauqdaej siengj gangj gijmaz lo? Gou naeuz mwngz ceiq ndei gangj genjdanh di!” Roegvenz mbouj naihfanz capvah roegga.

“Ndei, mwngz dingq gangj gvaq ‘roegga gwn raemx’ aen goj neix lwi? Aen goj neix couhduw haenh roegga dou coengmingz!” Roegga ndaengndiengq ngiengx aen gyaeuq de hwnj doiq roegvenz naeuz.

“Mwngz……mwngz” Roegvenz gip dwk cungj gangj mbouj ok vah lo.

“Neix cij dwg haenh cojcoeng mwngz, youh mbouj dwg haenh mwngz!”

Roegga dingq roegvenz baenzneix gangj, sawqmwh hozndat dwk naeuz: “Gyonj daeuj gangj, roegga dou cij dwg doenghduz vunzloih ceiq gyaez haenx!”

“Mbouj cinj mwngz luenh gangj, mingzmingz dwg dou roegvenz cij dwg doenghduz vunzloih ceiq gyaez haenx.”

“……”

Gyoengqde byawz hix mbouj saenq byawz, yied ceng yied haenq. Seizhaenx duz roeggyaeujmeuz deng cauz ndiu haenx menhmenh mbin gvaqdaej, buenq ninz buenq singj cam gyoengqde: “Sou ceng gijmaz lo? Lij hawj mbouj hawj gou ninz ha!”

“Bohlungz roeggyaeujmeuz,” Roegvenz miz laex dwk cam, “mwngz rox doxgaiq lai, itdingh rox song boux

dou byawz engq coengmingz, vunzloih engq gyaez boux lawz ba?”

Roeggyaeujmeuz dingq gij vah roegvenz le, sikhaek riu lo, “Hwhw, gou laihaeuz dwg gijmaz ne! Laxlawz sou dwg aenvih gij saeh neix doxceng ha. Gawqyienz sou baenzneix siengj rox, yienghneix gou couh naeuz sou nyi ba: Moix boux vunz cungj miz giz ndei caeuq giz mbouj ndei, mbouj miz vunz yienghyienh cungj ndei, sou mbouj wnggai angj gij ndeicawq hawj vunz rox, yo gij yaezcawq swheij hwnj. Rox lwi?”

“Rox lo.” Roegvenz caeuq roegga najmong dwk ngaemgyaeuj roengzdaej.

Daj seizhaenx hwnj, song boux de couh baenz baengzyoux ndei lo. Ndaw ndoengfaex youh dauq andingh roengzdaej lo.

(Siujhu)



Liujcouh Gyaeundeidei

美丽的柳州

Ranzmbanj gou youq cungq-gyang Gvangjsih. De couhduw Liujcouh “bya heu raemx saw dieg seuq” haenx.

Mboujlwnh mwngz daj baih lawz haeuj Liujcouh bae, mwngz cungj gamjdaengz baenz goengq baenz goengq byaheu caemj haeuj da daeuj. Doenghgij ndoi lingzlingz singsing soengz youq henz Dahliuj-gyangh haenx, lumj aenraet youq seizhah gyanghaet fwn doek gvaq le maj okdaej nei, gij ndoi neix youq ndaw geh heuloeg maj okdaej, yienznaeuz mbouj lien baenz megbya, hoeng de cix lumj dahsau namzfueng nei saundeidei hawj vunz simmaez.

Dang mwngz ndwn youq dingjbya Byayizfunghsan, couh yawj ndaej raen daengx aen singz Liujcouh, singz Liujcouh lumj aen batva gyaeundeidei, ndaw batva ceiq gyaeundeidei haenx dwg diuz Dahliujgyangh. Dahliujgyangh van bae ut dauq, de lumj dahsau gwnzmbwn foux diuzsai ndeiawj nei foux hwnj foux roengz, youh lumj duzlungz mbin neix youq ndaw singz mbin bae mbin dauq. Naengh ruz youz Dahliujgyangh, mwngz ndaej yawjraen song hamq dah faex nywj heusau, youq laj ndit doxcanj angj gij

saekheu saekloeg gyoengqde; diuzloh song henz dah, baenz go baenz go faexliux baiz baenz baiz, gyefaex unqnem duengh roengz dah bae; ndaw raemx, bya iq baenz gyoengq baenz bang, miz mbangj cwxcaih youz dwk, miz mbangj yat hwnj naj-raemx, miz mbangj ndonj haeuj geh rin mbouj doengh; najdah roegenq mbin bae mbin dauq, aenbak heuh cici cac a mbouj dingz, lij seiz mbouj seiz bek najraemx. Henz dah, miz sam haj boux vunz epbya youh baenz lingh cungj funghgingj he.

Liujcouh bya heu raemx saw haenx gaenq mbouj dwg dieg fwz dieg hoj ciuhlaux lo. Gizneix miz minzcuz funghcingz; miz yw “Ginhsangswj Houzbauj”, miz yaz-gauh “Liengjmcinh”; miz caux giceh, gangdiet gihdi; miz Auyin gvanginh……vanzlij dwg aensingz daengx guek vwnzmingz ndawde aen ndeu, dwg aensingz luzva senhcin daengx guek, dwg aensingz lijyouz maenhndeidei Cungguek……

Liujcouh dwg diegcoj gosien Liuz Sanhcej, nyienh mbanjranz gou youq ndaw singgo “Liuz Sanhcej” yied daej yied goksag.

(Liujcouh Si Dunghvanz Siujyoz sam nienzgaep Liengz Swji)

Hag Gaeqmeh Ok Gyaeq

学母鸡下蛋

Miz vunz cam, youq ndaw ciuhvunz bouxvunz seiz lawz ceiq vaiqvued? Dwg gauj ndaej cingzcik ndei? Dwg miz gijgwn ndei gwn? Roxnaeuz dwg seiz guhcaemz? Danghnaeuz cam gou, gou couh mbouj lawq saek di naeuz——dwg seiziq.

Seiziq dwg seiz simsoh gvaigvet, dwg seiz mbouj miz youheiq sing riugaekgaek, miz gij geiqndaej gou dijbauj nanzlumz haenx.

Bi haenx gou cij ndaej seiq bi, daxboh daxmeh daiq gou bae ranz daiq, caeuq daxdaiq youq duenh seizgan he, aengoj hag gaeqmeh ok gyaeq couh daj neix hainduj.

“Godoek godoek godoek”, duz gaeqmeh he ngiengx gyaeuj enj aek byaij youq ndaw rungz. Sawqmwh, de dingz roengzdaej, ga miz di vangoz, caekhaex loq saenq mbat he, aen gyaeq lumj gaemxgiemz hung he ringx okdaej. Gou aj bak daengx da, mwnhsaeng yawj aen

gyaeq haenx.

Gou roxnyinh gig geizheih, couh dwg gij geizheih neix hawj gou hix ndiengq aen caekhaex hwnj, gungj aenndang, mauq roengz, itmienh byaij bae byaij dauq, itmienh yungh rengz “w——w——”.

Daxdaiq dingqnyy gij doenghdanh neix, cungj mbouj gib uet raemx gwnz fwngz bae, vaiqvuet buet okdaej, umj dawz gou buet haeuj diengzhaex bae.

Daxdaiq cuengq gou roengz, duet diuzvaq gou. Daxdaiq guh gijneix gingqyienz baenzneix vaiqdangq, gou cungj caengz fanjying gvaqdaej. Caj daengz gou fanjying gvaqdaej, gou gaenq roxnyinh vutnaj dangqmaz, “ngw——ngw——” daej lo. Gou daej dwk naeuz: “Gou……gou mbouj dwg ok haex……gou dwg hag……hag gaeqmeh ok gyaeq hane, ngwngw……!”

“Haha, dahniq huk, mwngz baenzlawz ok gyaeq ndaej ha, huk lai lo. Haha!” Daxdaiq sien dwg ngawh mbat he, yienzhaeuh riuha, riu dwk gou cungj naj nding lo.

Gienh saeh neix, yienznaeuz fatseng seizgan dinj, hoeng cix louz youq ndawsim gou ciengxlwenx mbouj lumz de, neix dwg gij saehyinx seiziq gou ha!

(roek nienzgaep Yez Cwnzveih)

